

EH Bildu talde politikoa
Grupo político EH Bildu

Ijentea, 1 - Tel. 943481027 - www.donostia.ehbildu.eus -
20003 Donostia

**DONOSTIARREK ELIKADURA BEHARRAREKIKO DUTEN ONGIZATE MAILARI
BURUZKO KONTROL MOZIOA**

Olaia Duarte Lopezek, EH BILDU udal taldeko zinegotziak, Udalbatzaren Organo Araudiaren 98. artikulua oinarri, mozio hau aurkezten du Udalbatzan azter dadin. Mozioa 2022ko ekainaren 13an Pertsonen Zerbitzuen Batzordean aztertutako interpelazioaren ondorioa da.

JUSTIFIKAZIOA

2020ko azaroan, Alde Zaharreko hainbat bizilagunek Kaleko Afari Solidarioak taldea osatu zuten, kale gorrian zeuden norbanakoei afari beroak eskaintzeko gauero. Hilabete batzuk geroago, 2021eko martxoan, Egiako bizilagunek jarri zuten martxan ekimen bera. Aurten, Amara izan da bere afari talde propioa sortu duena (martxoan). Hortaz, gaur egun, hiru auzok eskaintzen dizkiete afari beroak kale egoeran dauden pertsoneri, bizilagunen solidaritateari esker, eta ekimena hasi zenetik 40.000 afari baino gehiago banatu dituzte.

Era berean, Espainiako Elikagai Bankuen Federazioak (FESBAL) egiaztatu du eskaera %50 igo dela azken urtean, COVIDen pandemia hasi zenetik. Gipuzkoaren kasuan, elikagai bankuen ordezkariak diote, pobrezia larrian dauden pertsonen gain, COVIDek sortutako baldintza ekonomikoen aurretik errenta ertainak edo txikiak zituzten eta orain egitura prekarioa galdu duten familiak ere laguntza eske joaten hasi direla. Bestetik, ERTE eta ERE izenekoengatik lana galdu duten bikote gazteen kopuruak ere gora egin duela antzeman dute. 2021ean %25 handitu zen Gipuzkoan elikatzeko laguntza behar izan zuten pertsonen kopurua. Hala, urtea amaitu baino lehen, 21.638 onuradun artatu zituzten eta 3 milioi kilo elikagai banatu ziren; 2020an baino %35 gehiago.

Hain zuzen ere, gure udal taldeak maitzean hainbat eragile sozialekin (Gurutze Gorria, Emaus, Arrats, Sos Arrazakeria...) egindako bileretan, guztiek elikagai beharrari buruzko kezka konpartitu zuten. Adibide batzuk jartzeagatik, Gurutze Gorriak Karlos Lehenean duen lokalera 130 familia joaten dira hilabetero elikagai bila, eta gehienak gizarte zerbitzuetatik deribatuak izaten dira. Caritasek eta Haurralde Fundazioak ere behar honetara bideratutako laguntzak bikoiztu egin dituzte Donostian, asteko ehunka familia lagunduz; kasu honetan ere udal gizarte zerbitzuetatik jasotzen dituzte deribazio ugari.

Ekaineko batzordeetan delegatua interpelatu dugunean Udalak zuzenean gestionatzen duen Elikadura Programen inguruan, honako hau adierazi digu: 2021ean 182 familiek jaso zuten elikadurarako laguntza Larrialdietarako Diru Laguntzetatik (256.000 euroko inbertsioarekin) eta udal diru laguntza 255 familiek jaso zuten. Horrez gain, janari poltsen banaketa egiten da Hestian (33 poltsa), "Otorduak I" programan 54 otordu ematen dira

EH Bildu talde politikoa

Grupo político EH Bildu

Ijentea, 1 - Tel. 943481027 - www.donostia.ehbildu.eus -
20003 Donostia

egunero eta "Otorduak II" programan bi otordu (horietako bat beroa) 58 pertsonari. Abegi etxean 40 pertsonari eguneko hiru otorduak bermatzen zaizkie eta Gauekoan 22 pertsonari ematen zaizkie afaria eta gosaria. Delegatuak emandako datuen arabera, hortaz, 644 familia-norbanako laguntzen dira egunero, haien elikagai beharrak asetzen, eta, zenbaki honi hirugarren sektoreko elkarteek laguntzen dituzten pertsonak gehitu behar zaizkio. Baina, gaur egun, ez dago datu hori topatzeko guno o biderik.

Gauzak horrela, zaila zaigu hirian elikadura beharra duten pertsonen kopurua zehaztea eta laguntza programak eskaintzen dituzten eragileen datuak zein onuradun kopuruak zehaztea.

Irmoki sinesten dugu pobrezia ez dela zatitu behar hainbat atal estankoetan (pobrezia energetikoa, teknologikoa, elikagaiena...). Baina, era berean, sektoreko adituekin eta akademikoekin bat gatoz: egungo Diru-sarrerak Bermatzeko Euskal Sistemak etengabe garamatza pobrezia zatikatzen duen eredura eta gizarteratzeko ibilbide arrakastatsurik sortzen ez duen esparru batera. Are gehiago, benetako zailtasun ekonomikoak dituzten familiak sistematik kanpora uzten direnean.

Hortaz, gaur egun dugun markoa aldatzen ez dugun bitartean, horretara egokitu beharrean gaude eta, gizarte-ongizateko beste arlo batzuetan diagnostikoetan oinarritutako estrategiak ditugun bezala (Donostia Lagunkoia, +55 programa, adingabeentzako arreta goiztiarreko programak, adineko pertsonentzako bakardadearen inguruko estrategia eta abar), uste dugu hiriko elikadura beharren inguruko argazkia behar dugula. Argazki hori ezinbestekoa izango zaigu herritarren oinarrizko beharrak asetzeko helburua duen estrategiak, esku-hartzeak eta elkarlanak egokiak zein integralak izan daitezen.

Hortaz, azaldutako egoera kontuan hartuta, behean sinatzen duen zinegotziak honako MOZIO hau aurkezten du:

KONTROL MOZIOA

1.- Udalbatzak hertsatuki eskatzen dio Udal Gobernuari diagnostiko bat egin dezala hirian elikadurarako laguntza ematen duten zerbitzu publiko, eragile pribatu zein elkarteekin batera, egunero ematen diren baliabide, laguntza eta haien onuradunen kopuruaren estimazio eguneratu bat izan dezagun.

2.- Udalbatzak hertsatuki eskatzen dio Udal Gobernuari diagnostiko hori Donostia Sustapenaren laguntzarekin (Hiri Ekonomiako Behatokiaren) egin dezala.

3.- Udalbatzak hertsatuki eskatzen dio Udal Gobernuari diagnostikoa Udalbatza osatzen dugun talde politikoekin zein Gizarte Kontseiluarekin parteka dezala, horretara bideratutako bilera edo saioetan.

EH Bildu talde politikoa
Grupo político EH Bildu

Ijentea, 1 - Tel. 943481027 - www.donostia.ehbildu.eus -
20003 Donostia

Donostian, 2022ko ekainaren 16an

Olaia Duarte López
EH Bildu udal taldeko zinegotzia